



蘆中集卷六

起庚午九月  
盡辛未十二月

太倉王攄虹友著

泊京口

萬木已黃落亂山凝暮愁  
可憐江館夜猶是故鄉  
秋風咽孤城角燈昏旅客舟  
明朝揚子渡人去水  
東流

發維揚

松菊惟應守故蹊無端塵土歷燕齊  
家貧衣食謀何拙身賤文章價自低  
霜雪從教添旅鬢琴書忍負逐征蹄  
花枝歌板紅橋路畱待歸來醉似泥



孤鴈

何處一孤鴈嘹嘹天外聞聲猶思故侶影自入重  
雲塞遠飛仍怯沙寒宿不羣獨於搖落候來往楚  
江濱

宿平河橋

清樽消旅夜白髮向京華身老猶爲客途窮轉憶  
家孤燈懸壁暗落葉打窓斜惆悵黃河岸明朝撲  
面沙

寄同學諸子

惆悵言歸未有期參辰方歎各天涯當今世態輕

貧賤我輩交情在別離山店月明人夢遠河橋霜  
滑馬行遲臨岐無限沾襟淚灑向東南寄所思

至淮上

兩渡黃河北勞勞今未休城臨淮水暮樹入楚天  
秋才了緣何事衰遲已倦遊宵來有歸夢泪盡海  
東頭

入山左境

淮上行千里青山望却無明朝渡沂水一一見龜  
鳧車服思先澤魚鹽想霸圖由來鄒魯地吾道慨  
榛蕪

至鵝莊見山色

自來齊魯地曾未與山逢  
野店停征騎青天見數  
峰曉光嘶日出寒色入  
雲重遙想層嵐裏風鳴  
萬壑松

入山

亂山千疊翠斷鴈一行鳴  
鴈背人南去山隨馬北  
行周遭看未了犖确喜  
還平何處楓林下遙聞  
社鼓聲

發蒙陰

殘星數點淡秋空驚起鄰雞夢  
未終落落萍踪鴻

爪雪蕭蕭蓬鬢馬蹄風日高烟岫看浮翠霧盡霜  
林愛染紅爲有吾廬難忘却客程雖好憶江東

新泰見菊花

寂寞山城菊團團白露餘故園常見汝今日却愁  
余晚節人誰惜孤芳物自如此間開爛熳無乃托  
根疎

逢故鄉南歸者

爾南我北意何如此去京華千里餘恐使家中知  
客況相逢不寄一行書

望岱用昌黎謁衡嶽廟韻

願騎竹杖從壺公徧收名山入掌中岱宗魏我位  
乎震觀其氣象誠獨雄乃知靈竒鍾造化晦明變  
滅焉有窮十八盤邊路屈曲寒濤萬壑號松風天  
門直下懸瀑布陡絕勢與銀河通丈人偃蹇踞其  
頂三峰一一皆摩空西瞻嵩華或伯仲北踰紫微  
北嶽有五名一名紫微宮南祝融羣山環拱若朝謁青帝閭闔開琳  
宮樓臺照耀亂雲日猶如海蜃浮蒼紅精誠詎易  
感神聽竊欲拜跪申微衷天子東巡至於此特  
隆祀典親聖躬金泥玉檢傳後世功德謂匪前王  
同嗟我飢驅走京國此生未即溝壑終歸來誓必

償所願自笑晚歲緣何功上登日觀看浴日金烏  
夜半光瞳矐萬里扶桑一覽足置身如在東海東

### 出山

叠叠烟嵐色迴看馬尾邊一輪寒曉日萬里豁秋  
天屏障橫空盡川原極目全從茲瞻直北何處隔  
幽燕

### 不寐

殘秋旅夜十分長次第聽雞到曉霜可是多愁緣  
作客却今無夢暫還鄉靜求禪定心難伏力擺詩  
魔意轉忙蝴蝶蘧蘧何計得此方吾欲問蒙莊

任丘遇風

聲震千林木葉飛孤城何處望依稀天圍平野低  
征鷗人走驚沙澹落暉飽歷艱難應有此備嘗行  
旅不如歸嗟今世上綈袍少更助寒威徹絮衣

白溝河

相傳遼宋此間分衰草茫茫弔夕曛後代試看唐  
土地中原何止失燕雲

琉璃河曉發

夢回孤店一燈清上馬東方未肯明常恐姜家遲  
共被鄰雞特地喚人行

題渭陽圖送王咸中南還

渭陽情重各沾巾曉店雞聲月一輪草色青青隨  
馬去桑乾南望正愁人

送湯公牧歸用昌黎送湖南李正字韻

飛花紫陌春別酒青門晚北來雨雪多南去雲山  
遠天末附書回客中送人返旅思益羈孤離情暫  
婉婉徒御促登車親朋勸加飯何日五湖濱茂林  
同息偃

送自求膺公南歸繼席華山用東坡龜山

辨才師韻

百丈清規渾不改蓮華峰頭禪室在吼地今爲獅子聲撞鐘舊徹鯨魚背佛法東南道益尊 聖恩  
日月光難繪頻來雙樹共盤桓未易九天接磬欵  
詔傳瓶鉢返山中手捧袈裟出禁內維摩隱几  
寂不言辯才懸河喜無礙四衆咸皈世所榮一枝  
橫出誰爲對米熟當年憶本師舊房重過塵生磴  
懷淨名檠公用東坡孤山訪惠勤惠思韻  
言游里尚父湖宮詹清節世所無高門勝地致足  
樂恣情山水狂歌呼吾師不願偕妻孥獨親大道  
以自娛平陽老人傳心印言下直契無縈紆近依

城北結精廬蕭然瓶鉢如鶴孤儒門理學兼負荷  
不獨衲子叅團蒲人而如此真丈夫只愁無以供  
朝晡海湧峰頭建生塔意猶取法司空圖巾錫周  
旋五載餘別來蝶夢頻蘧蘧示我聖諦成亡逋恐  
教面壁難追摹

過涿州

去歲霜林疋馬嘶今來烟草又萋迷勞勞南北頻  
經此一片孤城落日低

宿新樂官舍

風塵憔悴鬢毛疎此是關山不子初遣興聊同今

夜酒經春不到故園書但知好懶嵇康似豈有能  
文阮瑀如來作孟嘗門下客更誰猶歎食無魚

內丘道中二首

春來不見故園花兄弟相思入夢賒行到田家荆  
樹下倍憐孤客在天涯

上下岡巒轍跡重太行西望削芙蓉鄉關迢遞三  
千里身在燕南第一峰

至襄國

晉地三分事已遙驅車古道草蕭蕭國恩世受慙  
無報不敢經過豫讓橋

登襄國郡樓同潘雙南作

茲樓西望太行開綿亘山形自北回老大風塵還  
作客飄零天地忽登臺賣漿意有奇人在擊筑悲  
從故國來同事幸逢狂阮籍却疎禮法好啣盃

題申鳧盟聰山集

往時聞杜老談藝賞清真極為茶村所稱不謂當今世還能

有此人苦心開突與隱痛及君親地下萇弘血千

年化碧新尊人端愍公死甲申之難

天雄署中和杜秋興八首

商飈颯颯振寒林官舍淒清景物森瓦落金波澄



夜色亭張翠蓋護秋陰署有老檜二株因名檜亭登樓莫遣飄零恨

拊髀空傷老大心今日無衣誰賦者不堪倦寢更

聞砧

蕭然禪榻髣絲斜作客燕南度歲華莫望揮戈廻

白日從知泛海有靈槎世情誰結王生襪旅恨徒

聞蔡女笳何處晚香尋舊蹟故園吾已負黃花

捲簾官閣對斜暉百感中來酒力微行路正愁人

北去時將之真定離家再見鴈南飛重傷魏博牙兵盡將

恨滹沱麥飯違寂寞諸陵空白露秋原苜蓿已應

肥

嘆息興亡一局棋千秋青史不勝悲偶當大厦傾

頽後還憶洪爐盪滌時憤切銅仙辭漢早憂深蘆

子塞唐遲腐儒何事偏生感轉展毋忘祖德思

猿鶴知應誚北山依人鹿鹿馬蹄間暫來門下休

彈鋏此去牆東遂閉關杯底有花欺醉眼鏡中無

藥駐衰顏荒江讀易殘年事寄謝蓬萊仙吏班

數椽茅屋海東頭藥圃瓜田次第秋自是仲長原

有樂何須平子但言愁耕鋤隴上驅黃犢釣艇江

邊侶白鷗羈客中宵頻念此狂呼從事醉青州

侏儒食粟有何功南國溪山在夢中金虎氣高吳

苑月水犀潮滿浙江風去拋橘柚千頭綠來犯塵埃  
兩眼紅麤飯濁醪吾事足故應歸作釣魚翁  
五湖歸路正逶迤鵝鴨門前水一陂雖逐轅駒行  
北地終爲巢鳥戀南枝關河任作蓬根轉時序驚  
看斗柄移赤葉黃花非故國吞聲野老淚交垂

中秋夜對月

清秋一片月遙出海雲端偏在他鄉見長如今夜  
難酌宜杯共滿坐恐漏將殘萬里同南北輝輝白  
玉盤

十六夜疊前韻

昨夜光同皎憂來遣百端清樽良友共樂事故鄉  
難影浸樓臺冷聲飄砧杵殘終宵零露濕雲際捧  
金盤

十七夜無月再疊前韻

蟾蜍猶未缺顯晦忽無端豈翳清秋久將輝永夜  
難雲連河影沒風落桂花殘爽氣金天失關山望  
鬱盤

十九夜復見月三疊前韻

曾掩重雲裏徐升孤樹端清輝寒不減圓魄照應  
難輪在九霄晷光連萬戶殘傷心衛霍室獨有內

金盤

九日署中登高次顧觀廬侍講韻

天涯作客又重陽形勝中山指顧長正有高樓供  
眺望更逢佳節共壺觴風前白雁雙蓬鬢江上黃  
花一草堂郢曲由來能和寡淳于飲興各飛揚

喜曾耳黃至

四月都門別相逢復此辰已多知己在特爲故鄉  
親竹葉傾須滿燈花喜竟真交情童稚久頭白歎  
如新

九月十五夜

前月今宵宿趙州一輪萬里正中秋高樓獨自凭  
欄望無限關山故國愁

誦侯弟家歌兒三寶聲技絕佳自主人之  
出不知所往感賦三首

未及垂髫見藝成我于尤物最鍾情三千里外歸  
來日何處花間聽囀鶯

花香月色可憐宵歌舞朱門去已遙爲問章臺街  
畔柳臨風誰折最長條

憔悴楊朱泣路岐鴿原南望不勝悲紫荊花下歸  
同醉腸斷當年舞柘枝

寄懷吳元朗進士用東坡送顏復兼寄王

鞏韻

神驥產自渥洼水驍騰近日惟吾子嗟余歷塊老  
不堪一蹶委棄固其理抱甕頻年學灌園飢驅遠  
客三千里仰看落月滿屋梁聚散人生真夢耳莫  
釐峰前一別君別後吟髭黑者幾長安碁局日益  
新廣廈何人庇寒士去冬有客計偕來遺我尺素  
書一紙書中反覆道相思時正冰霜綻梅蕊迢遙  
南北恨各天鴛鴦參辰孰可擬福性幽棲是所宜  
風塵蹶躅將歸矣君思除日遇京華早俶行裝馬

加箠問我依劉近若何為言王粲登樓始

得周懸著凶問哭之

吾友今淪歿風流委逝波學窺二酉富文辨六經  
訛時輩嗟誰及儒林望匪他上書辭北闕設教老  
西河身隱耕巖慣人來問字多性原輕紱冕志只  
在咿哦原憲貧尤甚嵇康懶未過余方行故里君  
即抱沉疴無復斯人矣將如吾道何招魂非宋玉  
南望有哀歌

落齒用昌黎韻

人事或不祥往嘗夢落齒及今則果然痛者落而

已恐其落漸熟所落未即止浙遊鬚始白覽鏡輒  
增耻眼昏齒復落衆衰至將死我憂大嚼難茲患  
誠切已人傳固齒方朝來漱冷水行之經年久作  
楚愈莫比譬持水一杯與救車薪似左右俱動搖  
嗟哉吾老矣倘壽可古稀算猶踰一紀一紀落必  
空初生反同指齒寒由唇亡唇在今何恃舌柔故  
長存齒剛則折爾乃知柔勝剛此理毋忽視盡落  
未足悲不落未足喜修短有命焉任運斯爲美吟  
詩遠寄將以示蓬頭子

病中偶成

藥裏關心甚新詩總廢哦寒誰憐范叔病轉類維  
摩月冷蟲吟壁風驚鴈渡河壯心時強起猶擊唾  
壺歌

追哭亡室用杜新婚別垂老別二韻

夫婦人道始盡人願久長偕老胡不然棄我中路  
旁悲風入庭樹枕簟委空牀當其于歸日百兩迓  
孔忙鏡中好顏色桃李榮春陽雞鳴勤問寢婦德  
稱尊嫜謝公本憐女嬌小深閨藏遽爲無米炊懼  
非力所將蚤夜不辭瘁念之摧肝腸自從舍我去  
情緒殊蒼黃室中相向泣兒女紛成行終身守貧

賤意氣不得揚開箱視所遺無有完衣裳忍憶新婚時洞房紅粉粧不見林間鳥雌雄共翱翔永爲泉壤隔舉案復何望

兒女盡婚嫁垂老莫少安非云生計足所幸累粗完溘焉若朝露使我中心酸拊膺一長慟淚落何能乾溫柔以娛老此事宜達官如我窮獨叟誓今形影單誠知恩義重豈惜衾裯寒搖搖懸旌似忽忽損眠餐永無相見日不死爲情難人非金石固何以沉憂寬爲茲遠行役觸景增哀端孰不有儔匹吾生良可嘆往者客於越東西歷烟巒歸來共

言笑時正楓林丹而今嗟已矣魂夢相盤桓莊缶信可擊庶幾免摧肝

望太行積雪用昌黎和盧郎中寄示送盤

谷子韻

每從樓頭眺落日西上千疊芙蓉張忽然同雲慘澹合皚皚堆積滿太行萬里一色銀海似林花照耀山之陽峰尖翠嶺起高脊巖壑下伏如承筐幽崖暗谷望不到焉知險絕無車箱是時寒凍透肌骨悲風獵獵鳴枯楊陰陽舒慘各有候元冥司令何其忙譬若六軍齊縞素世間紫色應銷芒我非

荆高舊徒侶悲歌終夜殊慨慷衆中屬和者潘叟  
酒酣技癢同顛狂揮毫險語鬼膽破韓公與較誰  
低昂吟成擁絮各就睡一如天地皆閉藏天井關  
頭一夜雪往來路絕無周行 至尊窮簷憫黎庶  
亟令陳朽發太倉豈有袁安高臥處北窓可念還  
柴桑

定州感作

形勝燕南地思明此叛唐可憐天寶亂還仗朔方  
強寇盜今無異園陵昔未荒不堪追往事吟眺立  
斜陽

至清風店

舊是清風驛經過日欲曛林疎征騎去野曠戰場  
分遺鏃何由得前朝不可聞只今逢父老誰道石  
將軍

和清風店雪後題壁韻

吁嗟世事堪太息上天同雲方一色誰司變理中  
書堂佐君綱舉萬目張憂心下救瘡痍起不獨蠅  
營在金紫衣被海內皆歡顏窮簷無人凍欲死只  
今炙手多貴人薰天勢熖貂蟬新夜擁妖姬恣歌  
舞茱萸爲帳芙蓉茵何似窮愁著書客獨抱一編

揚子宅有時還去立程門門外雪深正三尺

寒

車馬去勞勞寒威徹緼袍風鳴孤樹直雪積衆山高閉塞時方甚陽和柄孰操元封曾有此偏在客途遭

至安肅

風饕雪虐異江南烏鵲空憐繞樹三菜甲由來聞最美可知不及故園甘

得隨菴兄信

忽得傳雙鯉真堪抵萬金關山來不易眠食念何

深相見渺無日未歸傷此心夢回姜被冷起坐欲沾襟

自定興至易州

拂面霜風木葉乾驅車前去弔燕丹可憐生長江南客誰識蕭蕭易水寒

過燕昭王墓

昭王好士築黃金古墓荒涼不可尋歲久蘚花碑字滅人來榛草野田深下齊恨有田單計奔趙知非樂毅心欲去停車頻太息數聲牧笛夕陽沉同吳商志夜話



客裏因依更幾人青熒燈火一樽親英雄有意藏  
屠釣天地無情老鳳麟語及傷心應慟哭吟從感  
事益酸辛珠簾甲帳俱零落猶自聞雞起舞頻

寄示昭復昭被用昌黎符讀書城南韻

幼學而壯行吾聞之子輿人生能樹立所恃詩與  
書詩書有明訓佩服始不虛苟不琢成器無乃迷  
厥初憶當初生日佳氣嘗充閭三十各上下成就  
今何如不殖則必落變化分龍魚至老而傷悲惜  
哉計已疎劉向富文藝秘書校石渠開閣公孫弘  
其先嘗牧豬婆娑月中桂入月爲蟾蜍如其自淪

棄焉免背生蛆白駒去何疾黽勉事稽居焚膏以  
繼晷慎毋少忽歟兄弟拙生計家無擔石儲便便  
富腹笥紅朽致有餘此中勤與惰非由父母且古  
人橫經暇兼亦親耰鋤兩者俱舐滯技恐窮黔驢  
農夫無咎歲請自勤菑畝講學以爲耨榛草從芟  
除挾持倘無具難曳王門裾惟懷席上珍籍籍多  
名譽方今炙手者再過皆爲墟戴仁而抱義可卷  
亦可舒倦遊吾將返漁樵老孟諸作詩以相勗努  
力無躊躇

友人飲博戲作用謝康樂齋中讀書韻

廬中集卷六  
官舍山城中負巖而面壑何以爲歡娛維茲消寂  
寔妙技逞屠龍貪情恣羅雀負者例出酒肴四郊壘正多一  
鼓氣方作意惟程卓求法用孫吳謔虐甚坑長平  
險猶拒劍閣但知博奕賢未省名教樂鬱鬱處樊  
籠舍之興安托

立春席上作用東坡冬至日與諸生飲韻  
一年春又至仰視尾參中但取朋儕合何愁道路  
窮金漿浮椀醲玉膾出盤饌禮數忘形極尊罍發  
興同跡羈三輔北家在五湖東焉得勞筋息聊憑  
旅夢通霜侵衰鬢白燭映醉顏紅荏苒方殘歲龍

鍾漸老翁傷農憂穀賤防寇祝年豐泥上留鴻爪  
山中憶桂叢供僧藏白氍邀客翦青松杳杳江天  
月蕭蕭驛騎風倚門憐是趙彈鋏恥非馮和暖逢  
挑菜飄零類轉蓬游將從向子禪欲問龐公不見  
平安信春歸盼北鴻

發長新店

飛飛暮雪犯征裘旅店淒清一宿留馬帶寒風來  
易水人迎曉月渡蘆溝西經城郭皆巖邑北望雲  
山是舊遊久作燕南流滯客還看春色玉河頭

和東坡饋歲別歲守歲韻三首

歲暮客囊空椒盤奚以佐紛然筐篚陳璀璨皆奇  
貨儉朴師唐風申情不在大閉門風雪裏獨作表  
安卧交遊乏金張自笑非驚座京華旅食艱安得  
給馬磨禮文尚往來奢侈未宜過何以報投桃曲  
高衆難和

日無長繩繫去去焉能遲所由歲行盡非可駟馬  
追黃鶴不復返相思渺天涯自春而徂冬奄忽曾  
幾時相與謀餞歲酒肴旨且肥來者勿云樂往者  
良足悲離別須臾間痛飲君莫辭往來歲相續甚  
矣吾將衰

四序相迫促經云井中蛇一歲忽焉盡齧人安可  
遮天地真逆旅浮生當如何冥心以觀道庶不紛  
喧譁茲與歲爲別畏聞鼓三搗終夜守不睡長河  
視西斜明日爲明歲老懷傷蹉跎人皆少而老年  
少母張誇

蘆中集卷七

起壬申正月  
盡六月

太倉王攄虹友著

元旦和許用晦韻

滿野哀鴻欲叫閻救荒西北急開屯

時方議賑荒詔  
直省各建常平

誰言薄蝕非天變

是日食

自念耕桑亦國恩擊筑豈

期來易水賃春祇合老吳門團團幸得依花萼同

對辛盤倒一尊

元夕遊燈市用東坡次劉景文上元韻

火樹燦銀花僅在金張府歲事若屢豐千門盡歌  
舞金吾禁不弛明月虛三五雖勤修省文駕馭亦

神武光明在君心燭照及海宇寂寥燈市遊無復  
繁華觀笑我馭吏如車茵醉頻吐鸚鵡賦未能狂  
搗襴生鼓緇衣久風塵衰髡日添縷早賦五噫歸  
刺船共漁父

次韻荅沈台臣贈行

聯床將一月言別最傷神蓬梗憐同病關河念所  
親悠悠徒失歲碌碌只依人媿我非無命知君必  
有鄰躊躇懷刺日珍重賣文身本是梁園客方爲  
鄭驛賓馮唐寧歎老原憲勿憂貧悽惻猶前度睽  
離復此辰良朋情繾綣故國事悲辛玉軸飛揚盡  
珠襦感慨頻園陵荒蔓草車馬過殘春歸自軍都  
塞應看雪涕新

喜唐實君進士入都用杜送程錄事韻

垂白客長安懷人感交集平生不稱意半百將過  
十爲與故人違蒼茫愁獨立赫赫平津門賴君才  
更入繫馬黃金臺相逢快莫及往時困蓬蒿有若  
蛟龍蟄自遇孫陽知受恩感欲泣洛蜀分朝堂潛  
師互相襲於此作魯連以誠非口給天地稊米如  
焉用爭一粒舉步皆棘荆難行憂路澁跼跼南征  
鳶下愁滌潦濕鷹隼橫高秋搏擊安能戢偉節旣

西行解之在所急

謝商志惠柑用李獻吉柑至韻

物自南方見益珍感君情意共風塵家人寄遠千山隔旅舍分甘一顆勻入口露疑仙掌滴開籠霜憶洞庭新明朝斗酒聽鶯處惆悵三年客裏身

寒食感作用昌黎寒食日出遊韻

依人憔悴貧非病不得看花花已盛去年今日在長安走馬紅墻見掩映自來此地天多風時作春寒與春競可憐寂寞負年華但寫相思寄吟詠昨宵三五光團團頭上一輪月端正節過寒食春漸

闌惆悵芳時來不更胡爲局促處樊籠動止人生且由命憶從四月別都門已見三經移斗柄同事恰遇同心人垂老自嗟還自慶結交世上重黃金我輩相期久而敬明朝連騎出居庸北望窮荒路幽負方今萬物各得所三公皆賢 天子聖曷不一飽同侏儒免使黔婁憂患併不然家食得優游水竹居邊遂懶性白頭千里歷關河苦受窮冬朔風橫迢迢丘壠隔天涯有酒難澆淚空迸故園景物今如何江漲桃花平似鏡未知何日得南轅拜謝故人樹佳政羈離無計強啣杯座上還愁酒兵

勁與君聊盡秉燭歡轉眼祝融又當令

清明日用高季廸清明呈館中諸公韻

又見東風燕子斜慙非年少可張誇空凋潘岳愁  
時鬢難覓崔塗夢裏家杯泛鵝黃侵柳色江流鴨  
綠漲桃花故園此際真堪憶無那飄零負歲華

贈吳商志用昌黎贈侯喜韻

我與吳生遇京邸同行南渡桑乾水是時天氣正  
清和日日征程芳草裏胸襟磊落非凡流馬尾相  
從乘短輶英雄邂逅豈徒爾結友如此夫何求吳  
生吳生不得已赤鯉居然混泥滓豈知神物雖池

中以待時來自可起方其未逢雷雨期往往秃尾  
人相疑長風吹動海波立頓挾雲氣揚鱗鬣吳生  
聞言躊躇久不禁往事欵欵悲我父生平逾管樂  
方可爲矩圓爲規有子父書不能讀年過半百心  
力衰生無所成老將至依人鉛槧終奚爲我謂吳  
生子休矣屈伸龍蠖各有時丈夫所貴在能忍願  
子毋以吾言嗤鯤鵬變化未可料而今且暫居沮  
洳

題王用儀三鎮表後

三鎮連兵未得安六州請吏獨稱難不收河北終

唐世豈待他年賂契丹

哭玉峰相公用杜故僕射相國張公九齡

韻

天地產人才有如金在礦相國獨挺生蹇諤丰裁  
整事業何煌煌名垂青史永當其未遇時讀書托  
箕穎臚唱首大廷致身金華省焚腹恣一飽時方  
磔蛙黽文章未復古苦心掃蕪梗弟兄皆璠璣下  
筆非凡境先後共登朝是誠邦國幸未幾廢蓼莪  
解組還鄉井服闋趨王程西臺待公領以視蕭望  
之剛方而鎮靜直道世不容相傾暫遭屏及燃牛

渚犀邪正 帝心省恐失陰陽和命調三公鼎未  
有郊遂移已成廓清境擬諸漢西京丙魏勲庸並  
方慶泰階平甘陵黨議騁白璧玷青蠅鶴聲夜知  
警累疏乞身歸五湖掛飄影安石臥東山蒼生正  
延頸大星寒墮波孤月翳沉嶺玉燭今誰調萬民  
命難請平生感知已一慟待歸艇

春晚憶故鄉次宋嘉升韻三首

柴門一曲抱清江日對熏爐坐北窓柳外亭臺鶯  
轉百花間簾幙燕飛雙不妨引睡憑書卷自可銷  
愁仗酒缸最愛小松新種得雨聲枕上聽淙淙



攬鏡空憐白髮長故園草色滿池塘人情易感緣  
遲暮天氣難逢是艷陽芳樹烏歌風送響落花魚  
噠水流香何時更領幽居味羈客傷春自斷腸  
只合江頭製芟衣無端客裏過芳菲愁心共水長  
東去征路隨鴻更北飛不識琴書誰可付多慙猿  
鶴未能歸夢餘想見家山好時正黃花入麥稀

穀雨口占和用儀韻四首

曉色朦朧半掩局恰逢穀雨雨冥冥牡丹花下金  
樽滿若在家時未得醒

烟柳絲絲著雨低馬行愁濕錦障泥歸心不待催

歸切怕有居庸杜宇啼

年華羈思兩相催心憶江南日幾迴愛殺桃花春  
漲滿門前鵝鴨一羣來

鈎簾竟日坐飛花鼓吹時聞兩部蛙無事清談僧  
舍好汲泉新試虎丘茶

憶齋中牡丹用李獻吉王左史宅賞牡丹

韻

花時每歲醉芳筵寂寂空齋穀雨天我已東西難  
自主爾今榮落有誰憐飄零白髮黃塵裏辜負清  
樽翠幄前家在夢中歸未得獨教泣露更啼烟

寄故園諸兄弟用杜送舍弟穎赴齊州韻  
老年兄與弟惆悵各東西聚首何由得分飛可忍  
啼飄零真泛梗衰病待扶藜獨背殘燈臥還家夢  
不迷

辛夷昨又開春盡夏將來已恨分離苦還堪節候  
催鶯聲殘茂苑草色滿燕臺明歲東籬菊同看亦  
快哉

客路交河北家林笠澤東人傷流落久書望往來  
通候騎關門月征衣塞上風飄蓬愁又甚滿眼況  
哀鴻

與潘雙南吳商志別

寂寂鶯花春漸闌馬蹄分遣入長安三人別淚樽  
前滿四月征裘塞上寒彳亍關山悲泛梗殷勤故  
舊勸加餐懸知此去緇塵裏腸斷銅仙泣露盤

與萬賓上別

花落春城朱夏初青燈官舍惜離居馬行邊地風  
塵苦書寄京華信使疎能恕灌夫常罵坐為憐阮  
籍慣迴車暫時分手躊躇久南望關山恨有餘

與陳虞佐別

唱罷離歌首重回去年此際遇燕臺獨憐王粲為

羈客爭識陳琳是霸才瀛莫斑駘驚暫別平盧錦  
鯉望頻來知君花下應相憶愁對清樽芍藥開

弔劉隨州

蕭條經故里何處哭文房大雅誠難作斯人不可  
忘風流悲蔓草感慨立斜陽五字長城在空今過  
客傷

發河間用杜發秦州韻

吁嗟五季末將相無遠謀石郎作天子輕棄十六  
州永貽中華恥茲事八百秋瀛莫氣蕭索孤城白  
日幽荒烟滿戍壘野曠多平疇 文皇都北平漕

輓東南求乃建天津衛溟海可通舟此地曾一過  
未嘗久遨遊南北襟喉係往來車馬稠廢興有陳  
蹟俯仰增煩憂連歲遭荒旱石田皆薄收流民載  
道路悽惻安能畱行李侵晨發殘星掛城頭還與  
故人別哽咽涕橫流聚散本何定此身浮漚浮歸  
心遶江水日夜空悠悠

任丘再過李氏園和壁間家侍郎阮亭韻

信宿重來此亭臺盡綠陰言尋芳草徑爰動故園  
心浙浙花間雨關關石上禽經行露濕好差足滌  
塵襟

過趙北口

重來春已暮一碧水涵天草色臨官道花香落釣  
船綠楊低著雨白鳥去沉烟絕似江南景鄉心倍  
黯然

至雄縣

憶自燕雲棄周仍建瓦橋三關形勝合五代戰爭  
遙往事增悲感孤城鎖寂寥經行春色暮落日馬  
蕭蕭

贈歌者張郎二首

鶴立雞羣迥出塵梅花標格賞清真如何雪虐風

餐地也有南枝嶺外春  
相逢恨晚別匆匆惱亂江南白髮翁長使尊前歌  
屈柘不知身在客愁中

送春和東坡韻

春去堂堂竟莫追黯然相送立斜暉拚將走馬花  
枝盡忍更聽鶯酒醜飛何處行逢漁父引不如歸  
息丈人機明朝正有攀髯泣豈獨東皇節物非

夏  
日立

渡渾河

草色萋萋滿渡頭飄零身在古幽州客踪爭似渾

河水但解南流不北流

河西務渡河

榆莢風前水急流茫茫曾此送歸舟  
如今又渡平盧去落日青山塞上愁

寶坻登寶祥閣

傑閣摩青漢孤城背碧峰頓空千里目  
忽到一聲鐘代閱遼金舊人悲戰伐重殘碑讀未已飄泊感萍踪

至豐潤疊渡渾河韻

周遭山色隱城頭望裏浮雲近  
薊州幾欲還鄉殊

未得輸他溷水獨西流

溷水在西門外凡水東流而此獨西名還鄉河

遷安道中

不意平州近南方節物同飄零人漸北  
曲折路還東橋下水流碧馬頭花吐紅  
出關成孔道陵谷感無窮

宿沙河驛

去國離家路幾千一燈孤驛夜如年  
可憐歸夢今尤遠身在令支古塞邊

將至永平

去城猶數里如畫見南臺海近龍腥入  
天清虎氣

來邊防從昔重客思到今哀旦暮平山上遙瞻碣石回

詠署中古松

堂後三松樹孤城此建標為城中最高處籠葱成偃蓋天矯向層霄老幹依山迥寒濤到海遙化龍非易得雨

露自前朝

明季為帥府

題黃欽緒畫蘭

蘭生空谷裏芳意發幽姿寫此縱橫態知君雅淡思當門從古忌紉佩至今宜便面煩揮灑靈均宛在茲

食石首魚

近海知魚美初經石首嘗充庖真可愛為口倍應忙底事猶彈鋏渾疑已到鄉老年甘此味每飯不能忘

虎頭石

平生七十戰往事已茫然不得封侯賞空令射虎傳風來騰蔓草星隕臥荒烟飛將名猶在休論漢武年

發永平

草自萋萋鳥自啼朔方山水愛遼西明朝又向昌

平路寂寞諸陵落日低  
流鶯故故傍人啼慘澹征途日欲西  
鎮朔樓頭回首望千山如黛海雲低

復至沙河驛

海氣蒼茫碣石開山光水色滿南臺  
纔爲半月平州客又到沙河古驛來

重過玉田

柳絮來時亂撲衣如今夏木暗郊扉  
風光最好京東路麥秀平疇乳燕飛

望盤山用弇州公遊盤山韻

盤嶺崢嶸去鳥回朔方雄鎮壯燕臺  
低垂碧落危巒近直下銀河亂瀑來  
紫蓋峰高寒白日黃龍院古積蒼苔  
天風絕頂何時至滄海遙臨水一杯

宿薊州用高常侍幕門軍西宿盤山韻

寂寂邊城中柝聲語夜永今年雨亦繁  
此地夏猶冷梯空山似華分野星非井  
頻將短鋏彈有媿長纓請壯歲事無成  
衰年跡宜屏豈同枳棘棲未得驂騑騁  
駘驂人或非愆尤自當省鶴髮嘆成絲  
鴈行憐弔影愛茲貧賤軀任彼窮通境  
殊方關塞重後夜星河靜孤吟到晨鐘  
此趣吾所領

劉氏園見竹

不到江南地如何有此君偶從蔣徑得豈在渭川  
分影碎窓間月聲寒石上雲平生風雨夜最愛五  
更聞

昌平官廨用李西涯題昌平館韻

磧路蒼茫漸向西烟村楊柳隱長堤人依官舍窺  
丹嶂馬入邊城飲碧溪陵寢興思三尺劍關門憑  
用一丸泥朝來福峽崎嶇甚歸日重尋壁上題

謁劉諫議祠次顧林亭先生韻

啣冤當日甚無名皇運誰扶致太平

李義山哭劉司戶  
詩有美扶皇運

史美直言傳後世人傷往事弔先生上書不避中  
璫怒下第還為絕徼行歎息元時方置祀昏鴉古  
道日西傾

甲申五月朔孫秀才繁祉同張參戎誠磔  
闖逆餘寇祭長思二陵至昌平聞  
而感賦二十四韻

否運逢陽九無端曆數更豈知張士氣自足振軍  
聲蟻欲逃猶聚蛙乘怒一鳴枕戈方待鬪斬木競  
為兵共數瀾天罪同披貫日誠師潛援睢水箭直  
射聊城竝入窮殲豕波飛急斬鯨一朝國耻雪連



戰寇氛清勦力幽燕靖遊魂關陝驚 文皇煩締  
造累葉慶承平宵旰 思陵最憂勤主德并中原  
將板蕩羣盜正縱橫宮闕妖星污乾坤殺氣盈赤  
符炎祚改龍馭鼎湖迎石馬無靈戰銅人有淚傾  
報恩惟草莽誤國盡公卿吉月獻俘至悲風哭廟  
生衰遲江表客流落塞垣行御道戕松柏明樓長  
棘荆猶然瞻紫氣無復薦朱櫻未展幽人拜彌傷  
共主精神功存宇宙遺德痛宗枋寂寞秦三輔沉  
淪漢兩京壯夫聞感激竊願請長纓

龍虎臺

此地名臺久當年駐蹕頻成祖宣英二至尊勤  
遠略薄海際休辰陵寢荒樵牧郊原遍棘榛不堪  
追往事風雨泣青燐

進南口

陡立雙崖峻猿猱莫敢踰由來稱下口自此抵軍  
都居庸一名軍都出塞通千帳當關制一夫欲窮天險勝安  
得憚崎嶇

居庸關次顧林亭先生韻二首

曾聞蜀道上青天陡絕居庸一綫懸險盡八陁將  
出塞居庸為太行第八陁徒來三郡本防邊漢建武十五年徙鴈門代上谷三郡民置常山居庸

東崎嶇客路關城下寥落人家戍壘前剩有先朝  
陵寢在傷心石馬臥荒烟

不盡浮嵐接大荒橐駝滿地夕陽黃西來山勢臨  
關險北向城形抱塞長將相無謀資寇盜朝廷有  
道倚金湯天涯羈客腸應斷迢遞音書過白狼

### 彈琴峽

又到彈琴峽崎嶇欽塞外行亂崖通馬過峭壁出泉  
清豈有薰風至誰爲流水聲泠泠巖石畔彷彿麋  
桐鳴

### 八達嶺

俯臨窺井似藉此壯關門石礙馬蹄怯沙深虎跡  
存險微平北口守實繫中原自古多成敗山川未  
足論

### 晚至岔道

落日征輪下坂遲孤城關口作藩籬自從寇燹遭  
塗炭非復承平駐蹕時

宣德五年上  
巡邊駐蹕岔道

### 榆林道中

何處高樓戍笛音孤城驛路近榆林山河寂寞應  
非昔亭障蕭條轉自今豈作萍蓬連歲久更來關  
塞幾重深麥秋梅雨傷心候莊舄思歸正越吟

蓮花池

此地曾經鳳舸移繁華銷歇不勝思渚蓮落盡空  
荒草舊是遼家太液池

宿懷來兵備故署

金元遺蹟久銷沉故署荒涼蔓草深可惜前朝邊  
塞上虛疲民力費黃金

老龍背

龍背千年古山根斧鑿開蜿蜒隨地去變化自天  
來泉出宵行雨車馳晝起雷蒸成芝菌瑞左耳割  
將回

鷓兒嶺

傳聞鷓兒嶺於此敗沙陀不見盛三矢相持戰夾  
河昔人餘事業遺蹟動悲歌懷古荒岩畔驅車未  
忍過

鎮朔樓

城下清河一曲流茫茫興廢不勝愁雲山是處連  
沙漠星野由來屬冀州萬竈貔貅憑守塞九邊形  
勝盡登樓壯心佇勒燕然石今日知誰到上頭

北山寺

行行北出廣靈門眺遠臺前朔氣昏遙望招提尋

路入閒將陵谷與僧論哀時試騁登高目懷古頻  
傷旅客魂小院香風花木秀孤城落日鼓笳喧棄  
繻有愧逢關吏投筆何功走塞垣久矣山河非故  
國依然風物是中原石麟磧路荒阡滿土穴人家  
古製存民多穴處者環列千峰青入戶微茫一水綠當軒  
無魚賓館歌長缺下澤歸心憶短轅到此勞筋猶  
未息可憐飄泊信乾坤

### 橋山行

鎮城南望橋山高白雲滄起翻銀濤軒后衣冠葬  
於此攀髯當日遺烏號時始教戰威天下遂擒蚩

尤涿鹿野至今人望軒轅臺猶自哀歌淚盈把  
思廟憂勤古所稀運移大厦不可支黃巾西來滿  
京國延秋門上烏啼時廷臣潛進南遷計啟鑰都  
城誰得制 帝因死國縊宮中 九廟爲灰六龍  
逝物換星移五十霜銅仙辭漢恨茫茫洞庭張樂  
知何處凝碧當年聽斷腸我今北走橋山道陳蹟  
荒涼空蔓草黍離無限故宮愁弔古傷今慘懷抱  
往事休論赤伏符諸陵佳氣黯然無年年麥飯東  
風裏贏得幽人泣鼎湖

### 上花園

敗垣零落幾家存五百餘年事再論玉輦金輿何處去土人說是上花園

下花園

塞草萋萋塞日黃下花園景更淒涼金元同一繫華盡怪殺人惟恨宋亡

重過居庸關次薩天錫韻

居庸關前山色蒼關外夏月天猶涼二百餘里走沙磧空中遠見雲屏張古來天險此爲倚人度羊腸愁欲死金亡冶鐵錮重門間道兵行速如鬼自遭蹂躪銅馬餘幾年所過無犁鉏亂後人耕城下

土茫茫白骨橫郊墟往事錯成六州鐵 九廟灰飛日無色濕餘河水聲潺潺猶道欲流未流血方今鎖鑰壯北門當關虎豹連雲屯萬方效順河清獻杜宇不復啼春魂嗚呼蜀道同崢嶸近聞丹嶂開五丁 聖人有意將休兵歸途且喜土微平吾知自此無戰爭

遇台臣

連日征輪犯塞塵居庸山翠接嶙峋南來一騎關門下驚喜相看是故人

猛虎行

廬中集卷七  
六  
南山有猛虎縱橫崖谷間食人無虛日人命輕草  
菅生殺王者事天位乃暗奸邊防或弛盡藉以當  
雄關郡有神君渡河去茲獨耿耿恐行路 聖人  
有道萬方清不用荒巖嘯風雨濯龍池頭龍正飛  
天門詖蕩開紫微豈猶龍德隱首尾故令陰類張  
其威在昔嘗聞鼠變虎磨牙吮血恣所取爲言飽  
食非可恒君不見永之鼠

瓶荷

插向軍持裏亭亭飮眼紅珠翻猶待露粉墮或因  
風可悟逢源理全資潤下功愛他心不染呪鉢許

相同

潞河鐵狻猊歌

重譯而來自西極豈聞聖人出中國赤毛紺眼狀  
獨殊屹立凝然潞河側此物相傳自元季是時天  
子荒於色宮中十六舞天魔焉用毛羣表雄特意  
者真龍起濠州天爲預兆人莫測未幾定鼎卜幽  
燕歷年三百炎精熄傷心一似洛陽宮門外銅駝  
臥荆棘豈如石馬在昭陵流汗陰兵戰不息迄今  
埋沒土花斑日炙雨淋遭剝蝕我 皇電掃六合  
清吳淖無諸盡擒克行看斬取郅支頭萬里車書

一南北尚有輸將困繭絲哀嗷連歲供軍食所願  
繪圖無監門耕鑿相安忘帝力狡獬狡獬匪偶然  
乃知禎祥歸有德

雨後見月

纔作翻盆勢當空一鏡飛蛟龍知有得烏鵲恨無  
依久客涕洟滿故園消息稀此時小兒女應亦望  
南歸

將入都喜作

將入王城隱還隨使節畱別來魂已斷至此病應  
瘳邊障窮箕尾天河近女牛鵲鴿原上醉雲物正

新秋

立秋用杜立秋雨院中作韻

涼風驚又至日月信如流莽莽天多雨蕭蕭葉正  
秋詩書皆失計樽俎之前籌每冀亡羊補徒成食  
肉謀疎狂中散鍛流落仲宣樓斯世甘爲棄吾生  
果自浮窮愁嗟未已衰疾苦難瘳籬菊垂垂發何  
時返故丘

進齊化門

曉發征車自潞河帝城雙闕望嵯峨悠悠歲月  
愁中去歷歷雲山客裏過屠狗今逢竒士少爛羊

方見貴人多五湖烟水蒼茫外歸唱南山種豆歌

蘆中集卷七終

蘆中集卷八

起壬申九月  
盡癸酉十月

太倉王攄虹友著

題家侍郎阮亭西城別墅十三首

石帆亭

空亭風葉秋寒色映石壁宛若浮江湖揚帆任所  
適天地本虛舟浩歌忘日夕

樵唱軒

樵子紛往來小軒遠塵埃謾謾松風鳴虛窓送清  
唱幽人聽未終月出東巖上

半偈閣



毘耶不二門本自無言說猶然半偈存豈與維摩  
別持此萬緣空澄潭印秋月

大椿軒

童童青蓋張老幹下撐拄雖微莊生言材大我所  
取屈曲蟠蛟龍夜來作風雨

雙松書塢

庭際立雙松清陰滿軒牖爲有高人俱鶴巢蓋非  
偶一一作龍鱗先生著書久

小華子岡

連山秋色高飛鳥暮天遠登臨向此中藉以煩憂

遣誰道輞川遊風流繼者鮮

小善卷

洞門晝長陰來去雲不定暗泉鳴松根苔徑洗綠  
淨人坐石床間如入龍巖勝

春草池

風暖水生鱗池邊草新綠散步憇林臯萋萋春滿  
目不逢謝客才池塘句難續

三峰

三山不可到左股何時失夜半忽飛來俄驚雷雨  
畢焉用訪神仙別求縮地術

嘯臺

天澹復雲閒登臺恣遠眺慨茲塵世中未易開口  
笑遂與蘇門人古今結同調

石丈

昔聞丈人峰今見丈人石蒼然太古形自具烟霞  
癖何處更逢君圮橋流水碧

竹徑

蕭蕭寒玉鳴疑在篔簹谷一徑入煙深入行萬竿  
綠不羨葛陂龍秋窓伴幽獨

綠蘿書屋

背郭草堂開四圍藤蓋瓦茶烟一榻清宴坐得瀟  
灑偶困撥書眠風來正窓下

憶吳中梅花用東坡和秦太虛梅花韻

萬木冬來已枯槁此花堪壓羣芳倒儵然天與出  
塵姿後時恐被穠華惱故向前村深雪中一夜東  
風開獨早天涯流落思故園水畔橫斜數株好鄧  
尉山頭春更繁白雲滿地香風掃素衣緇盡長安  
塵梅花將笑人空老豪家移種盆盎間此地相看  
太草草不如歸趑渡江船日坐西山向晴昊

和王用儀八新

月

廉纖屋角一彎留豈是吳剛斫未休班女尚遲紉  
作扇張家應妬玉爲鈎眠沙鴈欲驚絃去戲水魚  
將避釣游待得清光三五夜爲君乘興上南樓

煙

無邊春望總迷離水郭山村點綴宜暫得因風清  
澗壑尋看隨月入簾帷輕籠柳色鶯喧早濃護花  
香蝶過遲滿眼氤氳寒食近憶傳蠟燭漢宮時

鶯

春光九十未輕過何處飛來聽轉和花底數聲調

玉管烟中一點擲金梭丁寧乍向高枝出睨睨猶  
藏嫩葉多露夜風朝期作友臨觴不羨雪兒歌

燕

風暖泥融故故斜歸從社日識年華春秋但記往  
來路興廢已非王謝家纔過畫梁尋舊壘將臨舞  
席蹴飛花多情爲爾簾遲下鷹隼驚猜莫漫嗟

柳

不堪張緒憶當年如線如絲漸可憐纔有柔條輕  
拂雨尚無密葉暗籠烟風流未覺顰眉嫵婀娜先  
知舞態妍明到銷魂送行處任教攀折灞橋邊

荷

金塘激灩遠浮空初見田田出水中龜若要巢遲  
有日魚頻來戲動疑風衣裳楚客憂難製泉貨波  
神許暫通莫以涉江期尚遠清香尋滿館娃宮

泉

濺沫跳珠只細傾淙淙琴筑耳邊鳴忽驚雪乳亂  
千斛惟覺雨聲喧五更溪澗分來應盡滿冰霜流  
出有餘清茶經陸羽今堪問願就松風試一烹

草

纔見寒川燒隔林如茵依舊吐城陰馬蹄送去憐

猶早袍色侵來怪未深一笛樓臺春雨暗六朝丘  
壘夕陽沉茫茫綠遍江南北離思王孫恐不禁

送吳商志之中州

君家夫子非凡流用之帷幄應封留渭濱星隕從  
此休故京鐘簾無時收君爲之子能繼不使濟時  
艱才則優陰符一卷窮冥搜剡藤奕奕書銀鈎寶  
之不啻藏天球知君用心蓋有由軒后昔日誅蚩  
尤掃清六合休戈矛豈如刺客徒報讐頻年失路  
偕依劉深懷挾瑟齊門羞邇來燕市狂遨游差免  
對泣如楚囚世人相見白兩眸與我情好嘗綢繆

愛君佳句時唱酬驚聞搥碎黃鶴樓天寒北風尚  
颼颼杏花已放城西稠擬同花下停紫騮驪駒忽  
唱生離愁不禁別淚沾征裘問君安往之中州我  
亦將歸理耒耨未知後會逾幾秋長歌種豆南山  
頭待君東還訪瓜丘行矣聲譽聞諸侯大梁公子  
今勿憂侯生止此無他求

李花和昌黎韻

憶昔家園醉藍尾香風拂拂吹仙李白玉爲鈿艷  
莫比春光澹蕩無涯涘素月流天庶幾似夜深含  
霧看朦朧如睡美人呼不起羣驚海上飛瓊來冰

裾雪帔紛披開蕃釐觀中同一色天桃穠杏羞成  
堆年年時至二三月不惜痛飲傾金杯今從羈旅  
忽見此一日相思腸九迴可憐前宵風雨惡樹頭  
樹底安在哉白首老翁南望泣關山飄泊空塵埃  
壽王石谷六十用杜奉先劉少府新畫山

水障歌韻

吾谷霜楓故鄉樹錦繡千重裏烟霧大癡曾此醉  
河橋天然畫本留真趣笛聲吹動華山雲仙去人  
間不可遇四百餘年幻出君遊戲重來拂絹素三  
絕榮陽無鄭虔主家京國依師丹以君一幅掛素

壁石林雲氣時飛翻十丈黃塵來客此得無山中  
驚曉猿蘆溝古道驅車急乃是 至尊宣召入水  
患江淮地卑濕南巡下救蒼生泣畫師如今好手  
誰惟君筆飛鸞聳立賜租所過恩波潤問民疾苦  
窮毫末寫出 君王宵旰心涵濡萬物邦國活解  
衣盤礴向松窓落筆驚看妙入髓心苦良工誠有  
然方之古人應莫比十二霜縑千尺長終年繭足  
王城裏南歸頻夢故山薇以俟圖成獻 天子拂  
水岩破山寺其間清絕無泥滓長歌採芝自此始

寄許九日用杜夢李白韻二首

猶記我別君君情甚悽惻謂我老將至烏倦當知  
息別來夢魂牽彼此各相憶貧賤逐人行萍踪諒  
難測南北異景光風塵面黧黑安能久滯留恨乏  
雙飛翼還復念君貧憂傷損顏色有志希古人忍  
饑吟亦得

建安豈不佳綺麗未爲至所由貴清真以得風人  
意榛莽塞路衢掃除殆不易君也奮其戈能迴白  
日墜簞瓢常晏如不以移此志天實愛斯人工詩  
使憔悴關山走無益衰病祇爲累急歸共討論庶  
幾畢吾事

贈朱竹垞太史

問字南行路豈賒如何頭白遇京華相門經術仍  
韋氏史傳儒林本漢家退食不言溫室樹乞身應  
賜鑑湖花懸知志在親風雅翡翠蘭苕未足誇

破鏡

莫將初月比月自有圓時獨此圓無日雙眉待畫  
誰

殘燭

耿耿照無睡臥聞更漏深伴人啼到曉爲有未灰  
心

齒痛

前年曾落一今痛又何爲少壯時難再推遷理固  
宜未能開笑口豈敢望龐眉將作盧仝婢旁觀任  
爾嗤

和陶詠二疏

世皆慕簪纓誰肯休官去由來廊廟人罕得田園  
趣賢哉有二疏功成乃遐舉當時以爲榮父子並  
師傳上疏乞骸歸征夫問前路餞送滿都門揮手  
謝不顧辱殆始無虞庶幾永終譽旣歸會宗親娛  
樂無他務豈不念子孫教之安其素財多則怨生

茲理衆未悟今之富貴者徒爲得失慮視此一何  
殊青史賢愚著

贈王東發舍人

人皆井底蛙君是雲中鶴凌厲翔青冥窮交欣有  
託往者同遨遊年來嘆離索家學擅青箱交遊滿  
京洛吳楚無劇孟徒爲亞父噉終軍請長纓南越  
志必縛朝廷用此人應顯匡君略荆山璞未獻魯  
將戰頻却神物會有時延津劍須躍助邊至封侯  
漢世賞不薄以此就功名還當畫麟閣予也爲饑  
驅北來躡芒屨鷓鴣無枝棲幸得依花萼款段諸

侯門自憐久飄泊每與阮籍悲終感季布諾倘得  
借餘輝夫豈等螢爝高誼詎可忘一杯勸君酌蕪  
詞媿不文見笑於海若

送序璜姪歸里葬親即之邵陵

頻年執手在燕臺忽見麻衣慟哭回我自加餐無  
別語君方負土有餘哀東門煙柳春同餞南浦風  
帆曉又開明到三湘秋色滿登樓人識仲宣才

送茂京姪典試秦中

三秦文字盛於今奉使西行愜主心日暮馬嘶關  
柳去天秋人望嶽蓮吟斗間自識張華劍橐裏非



求陸賈金料得高堂知此意白頭應慰倚闔深

中秋用東坡和子由韻

一輪端正秋方高長空雲淨無纖毫建章鳩鵲相  
照耀千里萬里皆銀濤人言天香落桂子達者旁  
觀淡如水舉杯邀來盡我歡以外俗情都不起可  
憐日月如跳丸金天西望羣山蟠朱門但有酒肉  
臭豈愛影浸樓臺寒來月我將客河汴月色依然  
風景變何如此地爲歡娛消受金樽與檀板清輝  
如晝滿庭前洗杯更酌坐益堅一年纔得有今夜  
今夜那作尋常看斗轉參橫看愈好夢逐江花與

江草若教久污洛陽塵月且笑人人自老從今閉  
戶莫憂貧風月長屬菰蘆人只恐又被饑驅出明  
年此時五羊客

榜後示昭復

王符著潛夫陶潛詠貧士試觀達者心斂退非所  
耻擔簦來京師意在求祿仕時命旣不猶安其素  
而已選舉不以公有如日中市柄自錢神操濫觴  
斯極矣蝦蟇飽食月其罪仍磔死是必被天刑言  
之非妄耳願人泯怨尤反躬責諸已腹中有詩書  
富貴無涯涘不見漢丞相微時曾牧豕不見會稽

守亦由負薪始香草生芳洲所搴必蘭芷苟爲枳  
與棘鸞鳳豈棲止當如御駑駘努力加鞭箠當如  
植嘉禾終日勤耘耔二鳥羨光榮每爲識者鄙裏  
足不窺園然後人稱美家門懼太盛兢兢薄冰履  
祖宗功德深培養厚厥址一時遽滿盈未免杞憂  
起吾常爲此言汝豈昧其理王城一身藏靜以命  
自俟倘得捧檄歸九原慰而妣冠纓久風塵夢濯  
滄浪水不忍菊松荒行將還梓里臨別牽衣裾丁  
寧盡於此時一附書回開緘得狂喜

贈沈郎三首

畫堂絲竹沸三更冉冉駭鸞下碧城惆悵遊仙無  
一夢不圖今夕見雲英

雲髻粧成一樣嬌吟詩瘦盡沈郎腰當筵惱亂尚  
書慣羨殺銅臺鎖二喬  
纔得相逢惜便分一鞭回首玉河雲綠簑烟雨江  
南臥雖厭緇塵也夢君

贈周郎三首

色藝無多讓沈郎趙家姊妹在昭陽鬢絲禪榻三  
年客臨老魂消錦瑟傍

高宴華堂醉叵羅新聲子夜聽如何便將十斛明

珠贈破費纏頭也未多  
一樽黃酒不同斟秋色離情兩共深馬上明朝相  
憶處無言寒日下西岑

畱別制府東山兄

相逢肝膽便相傾一姓親情弟與兄垂老乍爲床  
下拜臨分偏作塞垣行時兄隨駕在口外還聞古調彈中散  
纔免窮途哭步兵慙愧侏儒徒食粟此生終擬報  
侯嬴

九日

客中每恨負重陽忽又登高黯自傷千古龍山成

勝事三年鴻爪寄他鄉日斜林外楓明赤霜早籬  
邊菊綻黃喜插茱萸兄弟共將歸此席是離觴

晚至定興

日暮羸驂倦行行至定興孤城籠薄霧遠樹出疎  
燈家遠心旌繫年衰鬢雪增逢人問投宿此地記  
吾曾

見道旁柳爲風所拔傷之

千絲萬線委塵埃薄命如斯信可哀不復青青還  
送客免教腸斷灞橋回

渡滹沱河

五渡滹沱水茲行倍惘然長爲燕道路誰記漢山  
川浪湧中流日林疎兩岸天三年還客此來往馬  
蹄穿

臨洛關曉發

嗚嗚戍角動城西殘夢初醒逐馬蹄曉月星河千  
里鴈秋林村落數聲鷄休因白髮傷行路正及黃  
花返故谿身賤恐爲關吏笑姓名旅壁不輕題

登叢臺

飄泊三年自北回今朝覽勝上叢臺太行雲霧晴  
天盡全趙山河戰地開挾瑟佳人何處去賣漿竒

士不重來當時能使秦皇懼主父誠然是霸才

入河南界

出都猶未幾屈指已旬餘郡邑經燕盡山川入鄴  
初驛塵衣上滿關樹馬前疎行及江南半將歸葺  
舊廬

銅雀臺故址

滿目荒涼是草萊相傳魏武有高臺豪華已逐漳  
流盡功業曾分漢鼎來破壁他年青史在望陵當  
日總帷開英雄末路殊難掩豈特羞稱萬乘才

至彰德

喚船漳水上下馬鄴城時百戰三分地千秋七子  
詩屢經人事變不盡客心悲依舊西陵月宵來照  
鬢絲

贈鴈

秋辭紫塞競南飛我亦飄零自北歸一路關河相  
送遠蒹葭霜冷共漁磯

鴈荅

相逐關山叫月飛三千里外送南歸明年又欲乘  
春北正是花時臥釣磯

鴈贈

汗漫雲山豈有涯三年流落苦思家如今遠赴瀟  
湘侶閒殺故園紅蓼花

荅鴈

雪泥鴻爪客天涯何處雲山是我家歸到五湖煙  
水畔伴伊和月宿蘆花

落葉

榮悴各因時紛紛委地宜若將松柏比霜雪豈能  
欺

登潞府望京樓

淒涼潞府已荒丘歸客天涯值暮秋憶弟幾回思

北望今朝却上望京樓

陳橋驛

出師本意是南征擁立隨看帝業成受禪未應由  
部曲祝天從此得昇平風雲舊屬興王地車馬今  
傷過客情何事最如哀北狩潺湲無盡濁河聲

渡河

河源來萬里云出自崑崙吼日洪濤怒浮天濁浪  
昏神功由禹鑿絕險束龍門三載幽燕客南歸轉  
斷魂

相國寺大殿火

紺碧前朝寺當年記一來甲子夏曾至此可憐正月火有似  
陸渾災寶地飄殘瓦珠宮盡劫灰宋家陵闕在那  
免廢興哀

題汴城旅壁

寒漏聽難盡殘樽坐獨親青燈不眠夜白髮未歸  
人迢遞家山月蒼茫驛路塵無端來古汴畱滯又  
經旬

信陵君墓

土人猶識得云是信陵墳歎息成千載風流冠四  
君豈嫌推晉鄙終見却秦軍回首夷門道蕭條悵

夕曛

至陳州用王摩詰宿鄭州韻

昨自浚儀來今投宛丘宿行李何蕭蕭風塵徒僕  
僕迢遞望孤城蒼茫走平陸地實介河淮民皆事  
耕牧犬吠籬間扉鷄鳴樹頭屋農事秋穫終人家  
晚炊熟豈羨士稚鞭長懷子真谷窮老心晏如平  
生耻干祿

澄清堂爲呂任菴明府題

使君心似玉壺清新築溪堂傍郭成卷幔雲霞天  
外落緣堤花柳鏡中明軒窓半入函關氣

與昇仙臺相距數武

絃誦時聞魯壁聲義學在其側觴詠公餘頻到此習池山  
簡並垂名

謁睢陽廟

祿山陷兩京唐室勢如沸玄元廟一哭義聲震天  
地誓死守孤城非云事必濟自覆潼關師乘輿久  
奔避賊議圖江淮憑茲一旅制不然鼓而南誰斷  
其右臂惜乎四百戰食盡終顛躓城陷逾三日援  
師鎬始至殺賊雖無成藉以衛神器從此朔方兵  
收京功乃遂赫赫精忠祠允宜祀百世黃巾遍郊  
垌明季遭傾毀呂侯締搆勞丹雘窮竒麗偶客梁

宋間摠衣拜階祀冕旒坐中央左右南雷侍隱然  
忠義心足壓戎馬氣所由叛諸藩鄰楚無烽燧剔  
蘚讀殘碑峴山同墮淚

臨淮渡淮用東坡渡淮韻

望望見楚天縱橫亂山碧行行涉淮水洶湧怒流  
赤落日明孤城寒烟積古驛地方濠泗間尚與吳  
會隔鞍馬雖云勞何如泛洪澤一葉風波危津梁  
得粗適殘年無他求速返吾廬畢關山行役疲于  
此圖少佚抱甕晨灌花安碁晝掃石渡淮復渡江  
飛鳥歸心疾

滁州山行

青蒼不斷勢如環上下坡陀稍覺艱人喜三年還  
海國天容兩度看滁山甲子夏曾過此路因來往輪蹄雜景  
自清幽水石閒緬想醉翁千載上風流何處可追  
攀

晚次滁州

夕陽山背向城外清渠漾衰柳隱人家楚天月初  
上

抵家用杜羗村韻三首

三載爲饑驅往來燕趙地故鄉在夢中飄泊今亦



至舉案嗟無人入門兩行淚琴書故依然驚喜歸  
心遂流光疾若斯撫景潛歔歔兒女坐更闌團團  
共不寐

貧賤長依人老年益寡趣豈不懷故林風吹斷蓬  
去南望關河重所思在荆樹彳亍無時休將爲蒸  
嘗慮歸及鶴鴿原相看淚如注且尋共被歡聊以  
慰垂暮

緇塵京洛歸路經古戰爭遙遙逐鞍馬寂寂還柴  
荆昨朝意始適柔櫓江南行親朋知我至沽酒言  
且清洗盞邀共酌相期在耦耕胡爲去鄉里役役

徒孤征寒暄未暇敘嗚咽傷離情因將別來事語  
罷當參橫

哭女二首

爲客京華去從夫塞上行未能歸會面遽及死吞  
聲永訣先三載長眠竟一生哀哀餘我在悽斷暮  
年情

一子難留得

生一子痘殤

蓬飛已斷根悲來那免泣念及

併傷魂哀最安仁切情惟彥輔敦左家有嬌女將  
與續姻婚

蘆中集卷八終



